



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

State teimbakati NEP mapa kuma
inyakdar: Dharmendra Pradhan

World Champion Pole
Vaultter Shawn Barber süogo



VOL. XXI NO. 97 (ADOK 97) DIMAPUR KÜPTOKNÜ (SATURDAY)

ANJETI (JANUARY) 20, 2024

₹ 5.00

Nagaland International Trade Expo (NITEX) tenzükogo

Dimapur, January 19, 2024 (TYO): Dimapur nung aliba Senden Reju, Purana bazar nung Chief Minister Neiphiu Rio-i 2 buba Nagaland International Trade Expo (NITEX) lapoktsüogo.

"Asen rongsenketzüng atema tilala shishilemba ya kanga tamendakdak lir aser linük GDP nung Micro Small & Medium Enterprises ajanga 33% agütsür" ta BAN President Mongkum Jamir-i tesentepertem pelaa agizüka jembidang ashi.

Nagaland ama state tilatem nung temlung magütsüra Union Finance Minister-i 2027-28 tashi nung India-i 5 trillion dollar economy atongtsü ta ashibaji tamakoktsü. State tulu aser tila ajak kasa renloktsüla, ta Mongkum-isa ashi.

"Sorkar aser private sectors tsüngda tesentaktep tajung alitsüla aser iba Expo ajanga state nung entrepreneurs adokdaksütsü, ajungmesotsü aser ajungkettsü. Iba expo ajanga state nung infrastructure tajungba agütsütsü lenmangtem bushitetsü aser iba ajanga state rongsenketzüng nung teyari angütsü" ta paisa ashi.

National Small Industries Cooperation-i Business Association of Nagas (BAN) office nung amenoka Nagaland nung kongsang ka lapokba atema pelar, ta CM Neiphiu Rio-i ashi. Bank aser senotsü rejutemi

entrepreneurs yariba aser credit link funds agütsüba atema pelar. Iba expo nung MoU aika nung sign süteptsü aser tejangrar nem maongka agütsür ta pai ashi.

"Nagaland nung market places, shops aser manufacturing units aika lir saka tangalen nungi investors mali aser local business ajanga mapa meinyakteter anungji iba asoshi mapa inyaksü nüngdaker" ta CM Rio-i ashi.

BAN-i lanurtem nem shishilembatsü maongka agütsür aser state sorkar teyari ajanga Nagaland nung BAN aser tanga agency temi micro industries dang masü saka big industries angütsü, ta paisa metetdaksü.

Senotsü rejutemi lanurtem dak skills repranger anungji lanurtemi training agütsüla aser skills tajungba akümtsüla. Iba expo ajanga asen sasa aazüktetsü aser tanga teyari magii inyaksangshia aotsü sabang angütsü, ta Chief Minister-isa ashi.

2 buba NITEX lapoktsüdag CM Neiphiu Rio-isa online ajanga National Small Industries Cooperation Branch office, Nagaland lapokja liasü.

Iba sentong nung mendenji Standing Committee on Tourism, Business Association of Nagas (BAN) Convenor Zubeno Mozhui liasü, Zonal General Manager, Nagaland Industries Cooperation Vijay Prakash-i o tatsüka jembia aser BAN Vice President Dr. Yan Murry-i anküp tepela o jembia.

Governor La Ganesan-i NEC plenary session nung aden

Dimapur, January 19, 2024 (TYO): Nagaland Governor La Ganesan den Chief Minister Neiphiu Rio, Deputy Chief Minister T.R Zeliang aser tongti ketdangsurtemi North Eastern Council (NEC) indang 71 buba plenary session nung aden.

January 19, 2024 nü iba senden ya State Convention Centre, Shillong nung amen.

North Eastern region nung külemi terenlok bener arutsü aser mangdang ayuba iba senden ajanga sayur, ta Governor La Ganesan-i o jembidang ashi.

Aluyimba ya asen rongsenketzüng tongtoret lir anungji modern farming techniques, credit facilities aser agro-processing units ajanga yimtsüng nung alirtem yaritsüla. Asenoki Agri-Tourism sector nunga temlung agütsütsüla ta paisa ashi.

Nagaland State nung agriculture den tourism takok ngua sendaktepogo. Hornbill Festival takok ngua amonger aser kümshia tourist teimba arur aser iba ajanga Nagaland nung tourism industry renlokba sayur, ta Nagaland Governor-isa ashi.

Nagaland sorkari skill development programs nung temlung kanga agütsür aser iba ya lanurtemi mapa inyakba nung shilemtajung agidaksütsü atema lir, ta paisa ashi.

71 buba plenary session nung adenertemi schools, colleges aser vocational training institutes lapoka educational infrastructure nung senotsü endoktsüla. Talisa education nung technology dendaksütsüla aser putu 21 buba nung lanurtem nem knowledge & skills agütsütsüla ta Ganesan-isa metetdaksü.

North East nung ali rongsen aser mapa ashir aika lir anungji NEC-i state sorkartem den yaritepa industrialization ajungmesotsüla, ta paisa ashi.

NEC ajanga tongtipang mapa inyaka arur anungji tashi tuluba akümtsüla. Maneni North East Special Infrastructure Development Scheme (NESIDS) ajanga lenmang nung temlung agüja mapa inyaksüla, ta Nagaland Governor-isa metetdaksü.

Paisa NEC dang 60% State Component kübok senotsü talila agütsütsü bilemdangtsü shidanga liasü. Iba mapa ya inyakra pei pei kintemi nüngdakba mapatongtem inyaktetsü aser North Eastern Region ajungalen renloka aotsü ta La Ganesan-isa ashi.

Maneni Northeast nung terenlok mapa inyaksü atema 10% GBS Fund ya kanga tongtipang anungji iba mapa takok ngua inyaksü nüngdaker, ta paisa shisem.

Modi'er sorkar kübok NE nung hon putu ajuruogo: Amit Shah



January 19, 2024 nü State Convention Centre Shillong nung 71buba Plenary Meeting NEC senden amenba mapang Union Home Minister Amit Shah den Governortem, Chief Ministertem kulemi agi noksa.

Shillong, January 19, 2024 (Agencies): Modi sorkar kübok tesüiba küm 10 ya Northeast atema hon putu ka liasü aser iba mapang infrastructure renlokba den ken o aika angatettepogo ta Union Home Minister Amit Shah-i Hokolbarnü ashi.

Northeast nung mokdang aser mepetmesü agi sünger aliba tanübo yimjung aser terenlok lenmang nung jajadar, ta Amit Shah-isa ashi.

"Shillong nung North Eastern Council (NEC) indang 71 buba plenary session nung jembidang "PM Modi lenisüba kübok Northeast nungi Delhi aser India nung tanünga tesemtem tetsüngdang kanga anasatepa kümogo. Infrastructure ajanga tetsüngda mali akümba dang masü saka kati ka meshii bilemtepa ajema kümogo" ta Amit Shah-i ashi.

"Tesüiba küm 10 tashi Prime

Minister Narendra Modi'er sorkar ya Northeast atema kanga tongtipang mapang ka liasü kechiyong iba mapang tesüiba küm 75 tsüngda terenlok dang nungi khenyongi talila inyakogo" ta pai ashi.

Northeast nung kin o kin, oshi, arrtsü aser telungpur teloktem ajanga kanga timtema aruogo saka tesüiba küm 10 tsüngda tensa süngjemogo aser yimjung aruogo ta Shah-isa ashi.

Northeast nung tesüiba küm 10 ya linük nüjiso ngur küm 75 den medemdangra hon putu (golden era) ama züngshitsü. Modi'er sorkari teti Northeast ya India nung tongtipang shilem ka ama züngshir, ta paisa metetdaksü.

2004 aser 2014 tsüngda Northeast nung ozüng alema inyaksangshiba 11,121 ataloka liasü saka tanübo 2014 aser 2023 tsüngda 73% ajemogo aser ibaji

3,114 dang atalok, ta Amit Shah-isa ashi.

Telungpur maparen kanga ajema kümogo kechiyong tesüiba küm 5 tsüngda telungpur telok balala nung züngsem 8,900 temadak tali temai adokogo. Iba ajanga linük ajanga dang yimjung aser azükaru sendaktepa lir aser item ya melira state tem merenloktetsü ta osang sangoktsüogo ta Union Home Minister-isa metetdaksü.

"Northeast nung yimjung aser tensa süngjemdaksütsü atema Modi'er sorkari agreements 9 nung sign sütepogo aser item ajanga law & order ken o aika angatettepogo" ta paisa ashi.

Assam aser Manipur nung tesem kar dak alaka 2018 nung Armed Forces Special Powers Act (AFSPA) kübok aliba tesem 75% tashi nungi iba ozüng agienogo, ta Amit Shah-isa ashi.

39 Buba OKM takokma nung tembangogo

Küpza, January/Aenjeti 19 (TYO): Mungdang sentong balala nung mungdangangertemi tangazükba tulu nguogo angazükba ama angazükbatemji mamadoki benshia taküm nung temoatsü sudakjang ta Mungdang shibangtsür Advisor Minority Affairs & Sericulture Wb. Imkongmar-i mungdangsanger kaketshirtem ayongzüka ashi.

Ongpangkong nunggerji Aoli tebu ta ajar, tebu ka mesüka alitsü kanga dang nüngtaker. Ongpangkong nungger ayongpang ka ama alitsüla, ayonglanglen tzi menena kümaka ayongpang nungi tziüji temerük yima lura ayonglanglen tziü menena alibaji merütsü,ibaji mesüka alitsü ongpankong nungger kanga dang shisa akatsüla ta Advisor Wb. Imkongmar-isa ayongzük.

Sentong nung OKM Planning Committee Convenor Dr.Maong Lemtur aser Local Planning Committee Convenor Wb.Imolangba tenati Enkep o jembia aser Pangzüng Luden aser Nungtet Luden osang agiba den sentong balala agia tembang.

Taruba 40 Buba 2027 küm Longso yimtak amongtsü Longsa yimsüsür ajanga sangdonga metetdakja liasü.

39 Buba Ongpangkong Kaketshir Mungdang Inti Mungdangdi Kúpza yimtiba nung "Nüchiba Shisaluym" omen nung ajemdaker amongba nungtem nung mungdangsangeri item pangzüng ya Tsüngrem temoatsü meshia sarasadema yamai renema ayu.

- Ongpangkong kaketshirtem nüchiba küma jangja jangjaa taküm renemtettsü asoshi küm metsüzüng(20 years) asoshi "OKM Mission Vision 2045" küm tashi nung taruba 2025 küm nungi kümshia kaketshir takotet süaka timtemer/nüngtakbapur kuli tejangja asadanger yaritsü. Iba mapatong asoshi Ongpangkong kaketshirtemi nungtem metsü sen (seed money) arishi küm tersürti (18 years) aser tema kenü nübo sen saruteptsü. Iba mapatong asoshi 2024 küm ya terenemshiba küm asütsü.
- Ongpangkong kaketshirtem

Aoli tebu tsükong ka ama asen ayak shisang shisanga litettsü aser Ao kin animesor aotsü nükla nung aser asen Ao oshi 8 Schedule-i yidaksütsü nükla nung Ao Senden aser Ao Riju nungita tang tagidak aliba OKM Tetsü Oshi Wazüka Ayuba Mapatong ya ano mera tasen agishia inyaka aotsü asoshi maneni akangashia renemshia ayu.

40 Buba OKM lenirtem yamai shimteta liasü.

- Tir - Tongpangmayang (Chungtia)
- Tatong Tir - Chubawati M Lkr (Longkhum)
- Tongti Zülur - Sungkumjang Kichu (Aliba)
- Repsem Zülur - Sensomeren Jamir (Kinunger)
- Senotsü Zülur - Lanuwati (Khensa)
- Sonaliba Zülur - Moanungsang Jamir (Settsü)
- Shisaliok Zülur - Takotiba (Longmisa)
- Metetpela Zülur - Salonger Jamir (Mokokchung)
- Sanen Luden Tayonger - Lanuakum Jamir (Küpza)

Tzüsapang aser Kapayong Sector community hall semzükogo



MLA & Advisor Imkongmar-i Aenjeti 19 nü Mokokchung yim tawabangba kübok Tzüsapang Sector Community Hall lapoktsür.

Mokokchung, Aenjeti/ January 19 (TYO): Imkongmar, MLA & Advisor, Minority Affairs & Sericulture ajanga Rogonü Mokokchung yim kübok Tzüsapang Sector aser Kapayong Sector community hall mesemtetsüdang, 'Salang mesüra Community Hall ya O tajung aser tamajung ajak alangzüka yokdak asünung ajaki akhümtsübutü aser yamaji yimsüsürtemia ochi agi yimsü südaktsünür' ta ashi. Advisor-isa Mokokchung yim tawabangba kübok sector tenet pronglai tebedi yim den lungjema aser amalitepa litetba

tenüngsanga, item ajak ya Mokokchung yim putu yimsüsürtemia külem lisemertem den junga litetba ajanga lir ta shia kasaji tarutsü nunga kati den amalitepa libaliretptsü ayongzüik. Ajioda, nüburtemidang junga libaliretetra salang/community hall ya senchi-menchi achidak ka masü saka konang nüngsang agütsüdak ka asütsü ta Advisor-ishi. Tongpangyanger-i aniba Tzüsapang sector community hall mesemetba sentong nung Tzüsapang Baptist Arogo Pastor, Rev. W. Supong-i Community Hall tasen meshiteta

sarasadem, Tzüsapang Sector Committee Chairman, Imowati-i tarur pela agizük; Women Circle, Tzüsapang Sector ajanga ken tajung ajanga telok ayongzüik; Guru J Nungsang Longkumer-i melepzüing o shia liasü.

Tzüsapang Sector Community Hall ya Senpak 26,80,830/- indoka yangluba osang Construction Committee Report ajanga metetdaksü.

Kasa anogo MLA & Advisor Imkongmar-isa Kapayong Sector Community hall semzüktsü. Kapayong Sector Community Hall semzüktsüba sentong ya SKM Baptist Arogo nungi Assistant Pastor Matsüing-i meshiteta sarasadema tenzük; Kapayong Sector Chairman Kora Jamir-i pela agizükba O jembi; Sector tenen telongjem convenor aser Mokokchung Village Council Chairman, L Mapu Lkr nati tepela O jembi; executive züngsem Marnungba-i mulungnen O ashi.

Kapayong Sector community hall ya sen lakh 52,000/- indoka yangluba Fund Raising Cum Construction Committee osang ajanga metetdaksü.

NDPP Noklak region consultative senden menogo

Dimapur, Aenjeti/January 19 (TYO): Nationalist Democratic Progressive Party (NDPP) Noklak Region Consultative senden January 17 nü Jungyam Fishery Farm Guest House nung Advisor Law & Justice, Land Revenue Government TN Mannen IAS(Retd) den menogo.

Senden nung o jembiba mapang Advisor Mannen-i, Noklak terenlok asoshi longjemer tasa tajung ka asatsü nüngdaker, kechiyong Noklak district nungi MLA anaprongla ya Neiphiu Rio lenisüba nung opposition maliba sorkar ka kübok shilem ka süaka tangbo minister menden mangu lir, ta ashi.

Noklak district kübok Myanmar den arrtsü nung international trade center amenoka lir asünung iba arrtsü nung aliba district ya rongsenketzüing nung renloka a otsü asoshi lenmang sadema lapoka lir ta pai ashi.

Paisa, Noklak nung nung handlooms aser handicrafts koda tajung aser koda state nung ajak dang tajungiba ama züngshir, iba ya wazüka yua international shishilembadakai yoktetsü aliba indang tatishitsü amshia nüburtem dang meranga inyaksü ajungshi.

Kin ka ama Naga nunger telongjem indang jembiba mapang Advisor-i, Naga nunger ya kin tila ka dang lir aser pei jurila policy aser tejangrabatem atema inyakba mapang takok tashi telongjem mesamadaksütsü merangtsüla, ta pai ashi.

Indo Myanmar arrtsü nung FMR shimbanga aliba indang jembiba mapang Mannen-i, iba ya yimden yimsüsüba tsütsü ken o tebenja ka lir, koba India aser Myanmar sorkari napronglai kanga kümdanga inyaksangshitsüla, ta ashi.

Advisor-isa Noklak nung aliba nüburtemi taruba Lok Sabha elections nung Neiphiu

Rio lenisüba nung party-i shimba candidate nem mulungsoa vote agütsütsü imlaba lemsatepa liasü. Paisa, party tenzükertem dang renema alitsü ayongzüka liasü.

Maneni Advisor-i, consultative senden nung sensaksemba ama NDPP Noklak region office ka amenoktsü atema süoki ia bilemba lemsatepba den iba ken o bentettsütsü asoshi tenangzüka agüja liasü

Iba senden ya C. Pushou President Agri & Allied lenisüba nung agi aser NL Pusha sarasadema liasü. Senden nungsa Noklak Region tir P. Pheem Shiu-i lokti pela agizükba o jembi aser Shingnyo V/P NDPP Nagaland & Noklak Region I/C, S. Heno Former MLA,CEC 57 Thonoknyu A/C, Tali President AGRI & Allied, President CYO, General Secretary NDPP Mkg Region nungeria tajungshi o jembia liasü.

Kohima nung Social Audit Public hearing agiogo

Dimapur, Aenjeti/January 19 (TYO): FY 2023-24 atema MGNREGA kübok 4buba Phase District Level Social Audit Public hearing, January 19 nü DPDB Conference Hall, Kohima nung agiogo, ta Project Officer cum PO (MGNREGA) DRDA, Kohima, Kevilhoubeiü-i metetdaksü.

Sangdong ajanga ashiba agi, Gram Panchayat/yimtsüngtem rongnung R. D Block Chiephobozou kübok Zhadima,

Nachama, Tsiesema Bawe, Chiechama aser Dihoma aser R.D Block Chunlikha kübok New Tesophenyu, Nsunyu, Sishunu, Tsongsa aser K. Station densema liasü.

PD/DPC (MGNREGA), Pfkulhou Koza lenisüba nung iba sentong agi aser State Resource Person, Social Audit Unit Nagaland, Vepo Keyho-i MGNREGA sentongtem indang aser Social Audit koda tongtibang iba indang

metetdakja liasü.

Kasa mapang nung Accountant General office nungi Independent Observer, Audit Officer, Taorem Arun Singh liasü aser District Administration tenüng nung Independent Observer ji EAC Botsa, Dr. Riku Khutso liasü. Iba sentong ya yimtsüng sasep nung Gram Sabha bangzüing azüngba aser mendenbubai tepela o jembiba sülen tembanga liasü.

Mokokchung DC-i metetdaksür

Dimapur, Aenjeti/January 19 (TYO): Mokokchung Deputy Commissioner, Thsuvisie Phoiji sangdong ka ajanga Mokokchung jila nung ata aliba sorkar tenzükter ajak dang January 26 nü 75buba Republic Day sentong anepdang 8:40 ako nung Imkongmeren Sports Complex, Mokokchung nung tenzüktsü, ta metetdaksüogo. Iba sentong nung sorkar tenzükertem ajak tamakok maludaksüi shilem agitsü DC-isa metetdaksüogo.

Kasa mapang nung District nung Office balala tekolaktem dang pei staff tem indang

attendance agitsü aser sorkari dangi abentsü asoshi DC office nung benoktsü atema tetuyuba agütsüogo.

Deputy Commissioner-isa, Ungma, Mokokchung, Chuchuyimpang, Khensa yimtsüng Village Council züngsem aser GB union tem aser Mokokchung jila GB tem, kiyong 18 indang lenirtem aser Mokokchung jila nung alirtem dang January 26 nü anepdang 8:40 ako nungi tenzükta Imkongmeren Sports Complex, Mokokchung nung agitsü aliba sentong nung shilem agitsü jaokogo.

Vuto Hyundai-i Kohima nung Hyundai Creta tasenba sayaogo



Kohima, Aenjeti/January 19 (TYO): Hyundai Creta tasenba; Undisputed, Ultimate tanü Kohima kübok Vuto Hyundai, New Secretariat Road (Sanuorü apu anasa) nung sayaogo.

Iba gari sayaba sentong nung Branch Manager, Bank of Baroda Nagabazar Branch Kohima, Munnuren Junul Kandulna alakteta jaoker liasü aser pai Vuto Hyundai Dealer Principal Metuo Liezietsu den külemi Hyundai Creta tasenba ya sayaja liasü.

Sentong nung Vuto Hyundai sales consultant Manao Singha-i, Hyundai Creta tasenba nung

features tem indang metetdaksü. Gari tasenba nung feature tasentem inoker aliba rongnung 360° camera, Level 2 advanced driver assistance system (ADAS den 19 feature), Dual Zone automatic temperature control (DATC), New engine option: 1.5 L Turbo Gdi (Gasoline direct injection) petrol, 36 standard safety features aser airbags 6 densema safety features 70 dak tema densema lir, ta pai ashi.

Hyundai Creta ya lakh 11 nungi tenzükter lakh 20 tashi nung angutsü aser petrol o diesel naprongla indang variant tenetnet angutsü.

Oral Health dak sendakba nung Health Workers training agi



Dimapur, Aenjeti/January 19 (TYO): National Oral Health Programme (NOHP)-i ayongzüka January 19 nü Chief Medical Officer Conference hall, Mokokchung nung ongpangkong block health worker tem atema oral health dak sendakba nung anogo ka training agütsüogo.

Sentong nung Chief Medical Officer Mokokchung Dr. Kibangkumba-i lokti pela agizükba o jembi aser sentong nung shilem agirtem dang oral health dak sendakba nung lanurtem nem tangazükba agütsütsü ajungshia liasü.

Training nung shisalen sayur Dr. Keneitheja IMDH-i, iba training sentong ayongzüka

agiba nükjidong tongtibangtibaji oral health ajungkettsü, oral tashidak balala jangjatsü aser nokdangtsü aser dental emergency first aid agütsütsü asoshi lir ta ashi.

Paisa, oral tashidak ya shine achiba, moko achiba, yi ajemba aser merekmeju maliba ajanga adoker aser tashidak kanga bulua adokbatem rongnung tepu ashiba, tepunü tashidak aser oral cancer amala densema lir, ta ashi.

Maneni pai, oral aser dental tashidaktem ya timba nokdangtetsü akokba tashidaktem lir aser ibayongji mapang shidak nung tashidak potettsüji kanga tongtibang ta ashi.



January 19, 2024 nü Solapur nung AMRUT (Atal Mission for Rejuvenation and Urban Transformation) indang project ti tenzüksüba sentong nung Ato kilonser Narendra Modi, Maharashtra Angh Ramesh Bais, Chief Minister Eknath Shinde, Deputy Chief Ministers Devendra Fadnavis aser Ajit Pawar nungertem tangokba noksa nung angur.

State aikati Ram tekülem ki semzükba anogo nung sodi sangdongogo

New Delhi, January 19 (Agencies): January 22 nü Ayodhya nung Ram tekülem ki semzükba anogo ya sodi anogo asütsü state aikati sangdongogo.

Uttar Pradesh kübok Ayodhya nung Ram tekülem ki semzükba sentong nungji Ato kilonser Narendra Modi aser Uttar Pradesh Chief Minister Yogi Adityanath na densema tongtibang nisung aika adentsü.

Maharashtra, Puducherry aser Haryana state densema state aikati iba anogomong nung sodi asütsü sangdongogo. Tripura nunga iba anogo nung anogo tesadang office ajak sodi asütsü. Uttar Pradesh sorkari shisaliok reju ajak sodi asütsü

sangdong aser Goa sorkaria sorkar office tem aser shisaliok reju ajak sodi asütsü sangdong. Haryana state sorkari iba anogo nung yi mayoktsü metetdaksüba den school ajak sodi asütsü sangdong, Madhya Pradesh aser Assam natia shisaliok reju ajak sodi asütsü sangdongogo.

Odisha nung state sorkar office ajak shibangtsü, Chhattisgarh nung shisaliok reju ajak shibangba den külemi iba anogo nung yi mayoktsü tuyuogo aser Gujarat nunga sorkar office tem anogo tesadang sodi asütsü.

West Bengal BJP Tir, Sukanto Majumder-i shidi ka ajanga Chief Minister Mamata Banerjee dang January 22

anogoji state sodi anogo sangdongang ta mepishiogo.

Majumder-i, iba anogoji linük atema nümatangtsü anogo ka lir, kechiyong mapang talangka raraa aruba sülen Ram asoba tesem tanaben nguogo, ta shidi nungji shia lir.

Paisa Chief Minister dang iba anogo nung nija organizations, schools aser colleges ajak shibangtsü sangdongang, ta mepishiogo.

Mamata Banerjee-i January 22 nü Kolkata nung aliba Kali tekülem ki semdangtsü aser la leniba nung 'Sampriti Yatra' (Harmony Rally) agitsü sangdongogo. Trinamool Congress-isa iba anogo nung state tesem ajaklen item ama rally ayongzükba agitsü.

State teimbakati NEP mapa küma inyakdar: Dharmendra Pradhan

Hyderabad, Aenjeti/January 19 (Agencies): Hokolbarnü Union Education Minister, Dharmendra Pradhan-i, state teimbakati National Education Policy 2020 mapa küma inyakdar, ta metetdaksü.

Paisa, NEP mapa küma inyaktsü memelungba state temia nungja balaka süaka iba mapatong ya mapa küma inyakdar, ta metetdaksü.

NEP 2020 dak sendakba nung osangbenertem den jembidang pai, "Ni kanga pelar. Parnoki nungja tanga amshiaka kecha masü. Ajsüüka state ajak amai National Education Policy 2020 mapa küma

inyakdar," ta metetdaksü. IIT-Hyderabad nung IInvenTiv 2024 tenzüksüba sülen osangbenertem den jembidang pai, Higher Education Institutions nungi iba ya linük nung R&D Innovation Fair tulutiba lir, ta ashi.

"IIT Hyderabad nung #IInvenTiv2024 tenzüksüba atema pelar. Iba sentong tanabuba nung asenoki iba mapatong tuluba kümdaktsüogo," ta pai ashi.

"HEIs aser industry aikati shilem agiba ajanga #IInvenTiv ya technology, innovation aser entrepreneurship sector nung tongtibang brand ka akümtsü,"

ta paisa metetdaksü. R&D Innovation Fair, IInvenTiv-2024 ya industry aser academia na tsünga tesendaktep tashi itdaksütsü nükjidong nung ayongzük.

Iba sentong ayongzükba nükjidongji Higher Education Institutes-i agiba research sayatsü aser tongtibang industries nungi stakeholders puadaksütsü atema lir.

Tarutsü nung institutes 53 longjemdaksütsü aser industry nung stakeholders 2,000 dak tema dang tongtibang project 120 sayatsü nükjidong nung iba sentong ayongzük.



January 19, 2024 nü New Delhi kübok Khan Market kiyong nung Union Minister Piyush Goyal aser tangartemi Gopal tekülem ki merüktetdang tangokba noksa nung angur.

SBI State Bank of India
STRESSED ASSETS RECOVERY BRANCH, JORHAT
 Na-Ali, M G Road, Jorhat, Opp. ASEB Building, PIN-785001 (Assam)

Sen apur/tem M/s Nature's Glory Department Store, Proprietor Smt.Helis Karki, I Z Complex, 3rd Mile, Dimapur, PIN: 797112 (sen apur)-i Bank dang nungi loan apuba sen-dong aser sen tetemlok meyipa magütsütet nung iba loan ji Non-Performing Assets (NPA) ta züngshir, ta sangdonger. Securitization and Re-construction of Financial Assets and Enforcement of Security Interest Act 2002 nung Section 13(2) kübok parnok indang tesütiba addresses nung notice agütsü, ajsüüka item notice ji parnok ket metongi meyipa aruogo, anungji yimjak nung parnok nem iba notice ya agütsütsüsa aküm.

Sr. No	Name of Borrower	Details of Properties/ Address of secured Assets to be enforced	Date of Notice	Date of NPA	Amount Outstanding
1	M/s Nature's Glory Department Store, Proprietor Smt. Helis Karki	All that part and parcel of land and building covered by Patta No. 608, Dag No. 140/816, Block - Darogapathar, Mouza- 3, measuring an area of 3456 sq. ft. i.e 00B - 01K - 04Ls in the name of Helen Sumi (Guarantor) at House No. 05, Thilixu Village, 3rd Mile, Dimapur, Nagaland. On the North: NH Nagarjan Road, On the South: Plot of Phushiho Yeptho, On the East: Plot of Phushiho Yeptho, West: Plot of Peace Yeptho	03.11.2023	28.12.2017	Rs. 20,11,554.75 plus applicable interest and cost thereon.

Substituted service of notice atema iba mera agia inyaker. Temalen shia aliba sen apur dang iba notice agütsüba anogo nungi tenzükba anogo 60 tsünga sentsühji agüjang ta metetdaksür, yamaji meinyakra iba notice agütsüba anogo nungi tenzükba anogo 60 abensaba sülenbo Securitization and Reconstruction of Financial Assets and Enforcement of Security interest Act, 2002 nung Section 13 kübok sub-section (4) nung ajemdaker ano maneni mera agia inyaksü. Iba Act nung Section 13 kübok Sub-section (8) nung aliba ama mapang tetemsü nung kiojan alangzüksü metetdaksür.
 Anogo: 18.01.2024
 Tesem: Jorhat

Sd/- Authorized Officer
 State Bank of India



January 19, 2024 nü Jammu nung Jammu & Kashmir National Conference Tir, Farooq Abdullah-i osangbenertem den jembidang tangokba noksa nung angur.

Lok Sabha election atema Samajwadi Party aser RLD tsünga menden lemsa

New Delhi, January 19 (Agencies): Hokolbarnü Akhilesh Yadav-i aniba Jayant Chaudhary-i aniba Rashtriya Lok Dal (RLD) nati taruba Lok Sabha election atema menden lemsaogo, ta Hokolbarnü parnoki metetdaksü.

RLD-i Lok Sabha mententem nung tokteptsü atema temeden nguogo; party-i Uttar Pradesh kübok Baghpat aser Mathura densema menden aika nung tokteptsü.

SP tongti lenir, Akhilesh Yadav-i Rashtriya Lok Dal-SP teloktep yangluba atema tenünsang agütsü.

Opposition INDIA teloktep nunga züngsem party temi bangjema inyaksü imlar, ta Bodhbarnü Akhilesh Yadav-i jembia liasü.

Taoba mapang nung teloktep raksaba, talisa Madhya Pradesh election nung atalokba dak sendakba nung Akhilesh Yadav-i, Congress den mangatetep aliba ajak bentetadokogo, ta ashi.

Bodhbarnü osangbenertem den jembidang Yadav-i, "Menden lemsatsü atema Samajwadi Party (SP) aser Congress den tang tejembidak. Samajwadi Party, Congress aser teloktep nung dena alirtemi Uttar Pradesh nung BJP tamakok ngudaktsütsü," ta ashi.

Tesüiba mapang SP aser Congress na tsünga menden lemsaba nung timtem adokba dak sendakba nung Yadav-i, "Ibaji puti otsü kümadokogo. Ibaji süiogo anungji iba atemaji mejembitsüla. Onoki tarutsü nung rangloker tejakleni aoer," ta metetdaksü.

January 22 nüü Ayodhya nung Ram tekülem ki semzükba sentong dak sendakba nung Yadav-i, "PDA nung alirtem akhümtsübu nung ang chichiba Ram yimli arutsü," ta ashi.

Samajwadi Party aser Rashtriya Lok Dal na loktepba ajanga Narendra Modi-i aniba BJP anema tokteptsü asoshi opposition party tem ajungshir. Party ana loktepba ajanga Uttar Pradesh Lok Sabha election nung temelenshi alitsü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 20, 2023

Kidang nungia asüngdangtsü akok

Tangbo senso kati government office nung inyakba langka ka indang danga metetnura pei kidang nungi online nung ketdangsertem den tejak o tejak na ngutepa asüngdangteptetsüsa Nagaland Information Commission-i lenmang lapoktsüogo. Iba lenmang dang "Hybrid Mode of Hearing" ta ajar. Iba lenmang ajanga yabo senso kati Information Commission nung alirtem den pai mesüra lai metetnura government office nung asüngdanga aliba indang asüngdangteptsü atema tsüngdong oa jembitsü menügdaker saka mobile phone ajanga tejak o tejak na repringtepa asüngdangteptsü akoktsü. Tanü putu nung technology aruba temoatsü dang masü saka government nung inyakertem dak nübertem yarinüba shisatsü aliba ajanga nübertem nem temetnuba ajak asüngdangtsü tashi agütsüba dang masü saka ajia mapa bolua mapang aser senotsü endoka ayazüka moi kidang nungi dang Information Commission nung ketdangsertem den tejak o tejak na ngutepa jembitetsüsa lenmang lapoktsür. Kechi government arudir aruaka, nübertem asoshi tajung kaji, government office nung inyakyim indang langka ka danga senso kati metetnura asüngdanga, aji langzüksüba ketdangser asoshi ozüng lir, anungji melangzünüyonga langzüksüba. Ibaji government-i nübertem nem agütsüba tashi, ajisüaka takoksa kaji, nübertem aikati iba tashiji amshia memetebatem aser metetnubatem metettsü asoshi masüngdang. Ibayongji, government office nung akaba sen aser osettsüset ajakji nübertem nem agütsütsü asoshi renemba aser ayuba ser nung kari agiadoker aser aji nübertemi memeteter. Ibaji kiburi memetet ser jangbong aremba amai lir. Aji oda, asenok aika nüngdak matalok aser mengutet timtemba ya tagitsü angudak aser inyakdak memetet aser mangashiba agi timtemba purtem lir. Ibayongji, akhidang nungi temetetertemi jembia aruba ama "Metetba nung tashi lir" (Knowledge is Power) ta asüba shitaka ta angateta amshitsüla. Atangji, metetbaji kaket azüngba nungi dang masü saka asüngdangyaba nungi angur, anungji nübertemi government mapa nung ketdangsertem dang pei metetnuba asüngdangtsü asoshi 'Right to Information Act' ajanga lenmang sademsadema lapoka yuja lir. Aji oda, senso kati government kübok office mashi ka nung inyakyim mashi ka indang metetnura, ibaji metetnura ketdangser dang asüngdangtsüba tashiji temepishiba o ka masü saka ozüng kümogo. Anungji, kodang office ka nung inyakba indang langka ka senso kati metetnura asüngdangdangdir, iba office nung ketdangser, Public Information Officer mesüra Assistant Public Information Officer, asoshi melangzü majung asütsü. Iba amaji senso kati government ita sen agia inyaker officer ka dang pa mesüra la inyakba department mesüra office nung atalokba indang langka metetnuba mapatem indang asüngdangtsü asoshi tashi tulu agüja lir ser nung mamshiba agi officer-temi nübertem akhümtsübuttsü melen mezüngmeshir. Aiben asenoki government nung ochimashi mapatem inyakba indang jembir, saka kechi ochimashi mapatem inyakar asenoki mejangjar kechiyong asenoki masüngdang. Ashiko, asenoki Right to Information Act ajanga metetnura officer dangji metetnura asüngdang nungbo asenoki jembibajiang shitak masütsüa akok aser shitak ka ataloka alinunga jet ta metongshitsü aser kibur ket tongtsütsü. Alima nung yimten tashi aittsüba ya yimsüsürtem dak masü nübertem dak keta lir, kechiyong yimsüsüsüba yimten tashiji nübertemi agütsür. Aji oda, koba lima aser koba yimti nungsa nübertemi government-i inyakba mapatem asüngdanga anidaker aser meteta pei tata shilem agir, iba lima nungji tiyazü aser ochimashi nisunga aser mapa-a mamonger. Atangji, senso ka teinyaktsü shilemjia government-i nübertem asoshi inyaktsütsü sentongtem aser inyakba mapatem indang metetnura asüngdangba kijaji masü saka senso kati pei lima aser nübertem asoshi inyaktsütsüba indang shilema dena metetnura asüngdangtsü tim.

OLEMSABANG

Tsüngrem mapa nung tenzükba temoatsü aser atakadem

L. Kika Pongener.

Alima nung tenzükba mapatem rongnung, temoatsü tulutibaji Tsüngrem'er mapa nung tenzükba ya asütsü sudi. Tsüngrem tenzükba mapaji kechisa asütsü (?)...ta asüngdanga, arogo, mungdang aser mission field, ministry etc. balala nung tenzükba mapatem ya asütsü ta tongmelang agi ashitsü akok. Aji oda, alima yimden yimli bangdak menden nung yimsüsürtem-jia Tsüngremi nungloktsüba mapa lir. Ano mimchir sobalibaa, kati ka den sentaktepa alitsü atema tenteta ayuba loktiliba tapu balala nung tenzükba, item ajungaji Tsüngremi nungloktsüba mapatem-sa lir. Shin o nung ashiba ama... "Nübur tenzükbaji Tsüngrem tenzükba". Ajisüaka, ni iba ocet nung lemsatepnübaji, mejetteta Tsüngrem'er mapa aser wadang nung tenzükba temoatsü aser atakadem indang kü shisatsü tangatetba yari aser laishiba nung shia aliba nungi olen kar lemsatepnur.

Tsüngremi Abraham dak jakzükba chirnurtem aser semchirtem, pa nubur asütsü atema tangar dang nungi balaka jatetba angur. Tsüngremi Abraham dang ashi, "Ner lima nungi, ner kinunger nungi aser nebu ki nungi apusoa, ni ne dang sayutsüba limai oang. Ni na agi kin tulu ka kümdaktsütsü aser ni na moatsütsü aser ne tenung ulutsütsü aser na temoatsü alitsü" (Lipok-12:1-3). Anungji Abrahami Tsüngremi ashiba angaa... Haran lima nung putu aika alidang, kimong-lumong aika yateta alitsü sudi, lim aser yokya-sonu aika wazüka aser tsünuteta alitsü sudi, ki-o-jen tajung aika yangerteta alitsü sudi, aser tebu-tebou nung nungi anguba senmang senti rongsen tajung tapayutsü aika alitsü sudi. Ajisuaka, Tsüngremi item ajungaji toktsür, pai sayutsüba limai oang ta ashi nungji, iba o-ji tashi anga-a, item tapayutsü senti rongsentem ajungaji toktsür Tsüngremi sayuba limai apusoa ao. Yongji Tsüngremi Abraham dak jakzükba chirtem aser semchirtem (Israel kin) alima kin ajunga dang nungi balaka alakteta moatsü aser ajungket. Tsüngremi ajaba aser nungloktsüba mapa nung tashi anga-a inyakba nung temoatsü tulu lir...ta Abraham taküm nungi asenoki lesson tajung angur.

Tanü asen putu nunga, Tsüngrem tenzüktsü mulongteter Theology aküngertem, Tsüngremi pa mapa nung tenzüktsü balaka jatetertem aser shimtetertem, Tsüngremi sayuba wadang, Tsüngremi nungloktsüba mapa aser Tsüngremi lidaktsünuba lima aser tesem nung, alima jangradem, tenukshitsü mapatem, sadok-sadoka aliba...Item ajungaji toktsür, Tsüngremi ashiba angaa tenzükba asü...??? Mesüra Jila tulu, takar arogo, itasen tulu angudak, 'Facility' tajung peria angudak... Ibala ama arogo aser tesem nungji dang tenzükba asü...??? Tesasatsüka, tanü putu nung, asen lima nung Tsüngrem tenzükertem aikati arogo tila, sensaker arogo, 'Facility' tajung peria malidakbo metenzükba...!!! Aji oda, asen lima tammang tia nung alidang, asenok shiruru jenjang nung alidang, leptep-tsüngtep, tekolak bushitepa, yimtsüng ka nungi kati aotsü tamakoktsü aser tetsübuttsü jenjang nung alidang... Dr. Clark nungeri-bo, America lima jangrademtsü lima, tenukshitsü rongsentem ajunga kecha mesukshi aser mapayui toktsür, asen lima tammang limai arur Tsüngrem tenzüktsü mulongtet. Asenoki tanü asen lima nung Tsüngrem tenzükter-tem aser Dr. Clark nungeri khen medemdanga bilemdangdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



January 19, 2024 nü Don Bosco Higher Secondary School (DBHSS) ground, Sechü-Zubza nung Angami Catholic Youth Association (ACYA) Golden Jubilee mong tetenzük anogo nung tangokba noksa nung angur.

ANOGO ABEN TSÜNGREM DEN

Temeshiba Metsü Prokba

Saka temeshiba prokeri chichiba sempet angur.

A.Shin 11:18b

Asenok taküm kümzüka alitsü leman aika lir saka temeshiba asoshi asenok sasa bendanga agütsüba nung sempet tulu agütsüba danga leman kecha nunga mali. Asenok jenjang ajak Tsüngrem temeshiba sayutsüla aji tekümtet ajanga asenok meyong lir: asenok tebilemba temeshiba asoshi bilemba asütsüla, idangji asenoki kechi bilemer aji Tsüngrem chir asoshi mapet masütsü; asenok mapa, idangji asen takümi temeshiba Tsüngrem ka tenzüker ta kuli asütsü; asenok tsüngchiba, idangji asenok tesendaktep ajak nung shingai mashishitsü.

Ne taküm nung nai Tsüngrem temeshiba sayur asü? Temeshibaji nai ne taküm nung mapa inyaksü melaba lir. Temeshiba bilemba metsü proktsü melen, nai tebilemba nung tamajungba aser temenen tebilemba indaktsür asü? Nai shi jangraba menokdangi mesüra tatok magütsütetba ne taküm nung lidaktsür asü? Yisui ashi asenok Tsüngrem aser Pa temeshiba tema bushira Pai bendenloktsütsü (Matt. 6:33).

Temeshiba metsü prokba nung sempet tulu lir. Tang nai ne taküm nung metsü proktsü sentong lir? (1 Peter 1:15). Ne tebilemba temeshi asütsü asoshi nai ne kolok nung temeshiba koda ayur? Na tsüngchir süa alitsü asoshi ne tesendaktep nung temeshiba koda arur? Asüng nai ne taküm nung temeshiba aluruba kanüra, tanü nai temeshiba metsü azüngtsüla.

Franklin Graham-i US arrtsülen 'God Loves You' sentong agitsü

January 19, 2024: Taruba ita sayutsüngir, Franklin Graham-i US arrtsülen God Loves You tour agitsü, ta metetdaksü.

God Loves You (Frontera Border) tour ji February 24 nü Brownsville, Texas nung aliba Brownsville Sports Park nung tenzüka sülen McAllen, Laredo, Eagle Pass, Del Rio, Presidio aser El Paso yimitem nunga agitsü.

Kasa tour ji Tucson, Arizona aser Yuma nunga agiba sülen March 9 nü Chula Vista, California nung aliba North Island Credit Union Amphitheatre nung tembangtsü.

Iba tour nung Taya, Marcos Witt aser Dennis Agajanian nungeri ken atentsü.

Billy Graham Evangelistic Association (BGEA) tongti, Franklin Graham-i X ajanga iba sentong agitsü anogotem aser yimitem sangdong.

Pai X ajanga, "Taruba ita #GodLovesYou Frontera Tour tenzüksü! Angati sentongtem nung adentsü atema GodLovesYouTour.com nung reprangang," ta metetdaksü.

Osangbener den jembidang Graham-i, pa arrtsüleni aobaji U.S. border policy anema jembitsü asoshi masü saka Yisu Khrista osangtajung kanga

nüngdaka aliba tesem nung Khrista osangtajung sayutsüngitsü atema aoer, ta metetdaksü.

"Takümbo onoki south tsütsü arrtsülen God Loves You Tour agitsü, kechiyong tang asen linük nung tenüngdaktiba tesemtem rongnung iba tesem densema lir aser nisungtemi Tsüngrem O ajanga teimla osang angatsü nüngdaker," ta Graham-i ashi.

"Tsüngremi kü melungjang nung khuret ka agütsüogo, kechiyong yangji (south tsütsü arrtsülen) tatalokbatemji ni nguogo. Anungji onoki Brownsville, Texas nungi tenzüka yimti ter nung Khrista osangtajung lemsateptsü aser Pacific tsütsülen mile 1,500 dak tali oa Chula Vista, California nunga sentong agitsü," ta paisa metetdaksü.

Graham-i, Tir election mapang ana nung aliba agi pa arrtsüleni aoer masü, ta ashi.

"Arrtsülen alir ajak-Arogotem, ozüng benokba agencies, yangji alirtem, onok yaritsü merangertem aser asen linüki arua alirtem ajaki iba tour atema yongyar. Ni arrtsüleni aobaji Tir election agiba küm asüba agi masü. Onoki iba tesem semdang, kechiyong timtem lir aser maneni timtem

tuluba dang akümer. God Loves You Frontera Tour ya Khrista osangtajung kanga nüngdakba tesem nung osangtajung sayutsüngitsü atema lir," ta pai ashi.

Linük koba nungi südir süaka Khrista osangtajung ya nisung ajak asoshi lir, ta pai ashi.

"Ni nisung ajak den osang ka lemsateptsü; United States nungi süaka, Mexico mesüra tanga linüktem nungi süaka Khrista osangtajung ya ajak atema. Ni nisungtem dang US-i arung ta majungshitsü mesüra oadokang ta mashitsü. Ni arrtsülen semdangbaji border policies anema jembitsü asoshi masü," ta pai ashi.

"Tzüraba aser yirua aliba nüburtem aika lir, anungji ni arrtsüleni oa parnok den Tsüngrem chir Yisu Khrista indang lemsateptsü," ta paisa shisem.

Testüiba küm tenet tsüngda Graham-i pastor tem, Arogotem aser temelungertem den longjemer US tesem ajaklen evangelistic sentongtem agiogo.

God Loves You Tour indang website nung shia aliba agi, iba tour ajanga nisung 570,000 dak temai Khrista osangtajung angashiogo aser nisung 34,000 dak temai Khrista agizükogo.

Chhattisgarh state nung Tenla ki asem shibangdaksüogo

January 19, 2024: Chhattisgarh state kübok Amdi yimdak Arogo asem nung Amongnü tekülem sentong tagidak mapang nung Hindu yimsü alia amangertemi timtem agütsüba sülen Tenla ki asemprong shibangdaksüogo, ta International Christian Concern (ICC)-i metetdaksü.

Lokti jagi Khristantem dang nenok adenshia tekülem sentong agira majungtsü, ta amokmeren.

Yimdak Khristantem tetsübu nung lir, kechiyong Hindu nungertemi amokmerenba dang masü saka police-ia parnoki

benokba ken o agizüktsü memelung.

Item Arogotem nung ozüng alema tangartem Khristan yimsü dangi meyidpaksür, ta tai tongloktsüba sülen pastor asem puogo.

Pastor asemji Immanuel Arogo nung pastor Santosh Sahu, Church of God nung pastor Thakur Ram aser A.G Arogo nung pastor Bhagchand Dhibar nunger lir. Tesülen par asemprong bail nung chiokogo, ajisüaka parnoki aniba Tenla kitem shibangdaksüogo.

Khristan kati, "Khristantem anema inyakba kanga bulua

akümba ajanga tamangertem tetsübu nung alir. Onok shisabulur aser mashie mapang nung loktii onok amaktsüa akok. Joko Amongnü tekülem sentong agitsü asü magitsüar onok ratamatar," ta metetdaksü.

Tawa Chhattisgarh densema state pongu nung assembly election agia liasü aser state aika nung BJP-i takok angu. Chhattisgarh nung Congress sorkar liasü saka BJP-i atsüngdoka sorkar akümba ajanga Khristantem anema inyakertem ano temelung ulushitsüa akok, ta ICC-i metetdaksü.

CPC list nung India mezüngokba atema telok aikati US aitsür

January 19, 2024: India nung Khristantem anema inyakba kanga bulua akümyonga U.S. State Department-i CPC (Countries of Particular Concern) list nung India mezüngokba atema Khristan temeden atema inyaker telok aikati US aitsür.

US nung amenoka aliba International Christian Concern teloki, CPC nung India mezüngokbaji ochi temeden anema lir, ta metetdaksü.

ICC Tir, Jeff King-i sangdong ka ajanga, "BJP nungi aser Bajrang Dal züngsemtemi 2023 küm pastor tem, Khristantem aser Tenla kitem aiben amak. Khristantem anema inyakba tatalokba 723 liasü saka iba dang nungjagi teimba asütsüa akok. Modi aser BJP ya Hindu yimsü alia amangertem lir aser parnoki democracy aser yimsü temeden atema nokdakertem ama sayur," ta metetdaksü.

2023 küm report nung U.S. Commission on International Religious Freedom (USCIRF)-i India densema linük aika CPC nung züngoktsü benoka liasü saka US State Department-i

magizük. ICC densema telok aikati India nung Khristantem reshikangshi tamajungba akümba nung ajemdaker CPC nung India züngoktsüla ta ashir.

USCIRF ya bipartisan commission ka lir, aser alima nung yimsü temeden dak sendakba osang federal sorkar aser Congress nem metetdaksütsü atema parnok nem mapa nunglokja lir.

USCIRF Chair, Abraham Cooper aser Vice Chair, Frederick A. Davie nati külem sangdong ka ajanga, "India nung yimsü temeden anema inyakba dang masü saka sorkaria nütsüng ajema aliba tamangertem maparen balala nokdang," ta metetdaksü.

"Onoki State Department aiben ajurua item linüktem nung tebilemstü aliba lemsatepogo, ajisüaka parnoki onoki benokba ajakbo magizüker. Onok temelung majemtsü saka US forign policy ka ama US sorkari yimsü temeden ya tongtibang küm daksütsü atema onoki maneni inyaksü," ta kasa sangdong janga metetdaksü.

Myanmar nung sepai 300 shi India-i jena iogo

Yangon, Aenjeti/January 19 (Agencies): Myanmar nung telungpurtemi jila balala atsünyonga aoba mapang ka nung sepai 300 shi arrtsü adena India-i jena ogo, ta AFP sangdong ka ajanga Hokolbarnü metetdaksü. Arakan Army (AA)-i November ita security force amak tenzükba sülen Myanmar kübok India den arrtsü nung aliba tesemtem nung mepetmesü tulu adokogo. AA-i ashiba agi, parnoki Paletwa jila aser India kübok Mizoram den arrtsü nung aliba

military base trok tashi atsüngogo. Sepai 276 parnok indang prangbong hadir bener Bondukbangsora yimtsüing tongogo, ta AFP-isa metetdaksü. November iba ceasefire tembangba sülen Myanmar nung sepaitem noklang aika India-i jenaogo, ta local media sangdong balala ajanga metetdaksü. Sepaitem anir aotsü atema Myanmar nung indang military tayimtsü ana Mizoram yimtiba Aizawl tongogo. October ita AA aser tanga

telungpur telok anati Myanmar kübok Shan state nung sepaitem amak tenzük aser China den arrtsü nung shishilembadak tongtibang tsemtem aser jila balala atsünga liasü. Taoba hopta China teyongtsüi ia Shan state nung ceasefire ka benokba iba telok yagi metetdaksüogo. Ajisüaka iba tenanzüktepba ya India den arrtsü nung aliba tesemtem atemabo masü, kong Myanmar army aser telungpurtem maneni raratepdar.

MULUNGNEN O

Onoki teti meima aliba asür tsürabur **Tekayangshi Pongen** (Mangmetong), iba akümlü toktsür aoba mapang onok mangyim khuret bener alidang kija, kibong, arogo aser lokti balala ajanga nübu, rongsen aser aria bilemba sarasadem agi onok den lemsatepba asoshi kanga pelar. Nenok kija shia dang tepela melemsatepteter, saka nenok temeim mapa tajung asoshi Tsüngremi moajangma.



Temeim Kinungtsü aser Kinungertem.

Asür Tekayangshi Pongen ASO : 1927 || ASÜ : 13/1/2024

N Korea-i 'underwater nuclear weapons system' ka tendang

Pyongyang, Aenjeti/January 19 (Agencies): North Korea-i ashiba agi, parnoki "underwater nuclear weapons system" ka tendangogo. US, South Korea aser Japan nungeri iba hopta military drill ka ayongzükba agiba atema telangzüba ka ama iba weapons system ya tendangogo. Tzü telung nung amshiba drone kobai nuclear hadir ka dena bentettsü ta North-i shia arudar, iba drone ya linük anütok tükümlen tendanga liasü, ta state media sangdong ka ajanga metetdaksü. State media-i osang agütsüba dak alaka iba hadir tendangba indang kuli kecha mali aser Seoul-i taoba mapang ashiba agi, North-i iba drone-i inyaktettsüba indang rasa ashiba ya tali tapong jembiba ka lir. South Korea-isa, iba hadir tendangba indang osang agütsüba ya parnok rongshitsü merangba ka lir, ta ashi. Iba ajanga Korean Peninsula aser alima ajunga nung yimjung amokmerener, ta Korea defence ministry-i ashiba den, North Korea-i onok indang indanga rongshira onoki telangzüba tesashi agütsü, ta shisem. North-i taoba mapang "Haeil-5-23" system tendangba indang metetdaksüogo, ajisüaka tang tatalokba yabo North-i hopta ishika military inyakyim balala benoka inyakyonga aruba mapang ka nung atalokogo. Deobarnü parnoki, solid-

fuelled intermediate-range ballistic missile ka bendenlokba indang metetdaksüogo. January ita mezüngbuba hopta South Korea den tzyüim nung arrtsü anasa artillery injang aika khatokba sülen tang North-i iba hadir tendangogo. Pyongyang lenir Kim Jong Un-i, pa inyakyim melechia ita ishika tsüngda yimjung asoshi tenanzüktepba balala yanglur aliba aginogo. Hokolbarnü North Korea-i ashiba agi, Washington, Seoul aser Tokyo nungeri military drill ayongzükba agiba ajanga parnok rongmesoa parnoki tzu telung nung amshiba hadir ka tendangogo, ta state agency KCNA sangdong ka ajanga metetdaksü. Parnoki, iba drill ayongzükba agiba ajanga Korea linük ana temeket nung tensa mejungi kümdaksür aser North indang security amokmerener. US, South Korea aser Japan nungeri ashiba agi, North Korea-i military tsütsü jenjang agiba nokdangtsü atema parnoki taoba küm exercise tali ayongzükba agiogo. North-i nuclear ballistic missiles aika tendangba den hadir tasen yangluogo, koba UN-i tenokdangba agütsür aliba anema lir. Ajisüaka Kim-i ashiba agi, peninsula nung mashi mapang ka rara adoktsü akok aser iba atema parnok prangbong hadirtem renemshir. Küm taseni ayaoka aiba sülen pai, South Korea den

tesendaktep dak sendakba nung police kar melenshiba metetdaksüogo. Iba hopta tetenzüklen pai, South den longjemtsü atema taoba mapang sensaksema aliba tembangogo aser South ya parnok tsükchir tongtiba lir, ta shiogo. Par linük military aser nuclear capabilities renloka aoba indang osang balala lemsatepba sülen pai iba olen ya lemsatepa liasü. Taoba küm September ita North-i, parnoki indang mezüngbuba nuclear khatetba submarine saya liasü. 2023 küm March ita nungi tenzükba parnoki Haeil system - unmanned, underwater nuclear-armed drones tendangba indang metetdaksüogo. Korea oshi nung Haeil tetezü ya "tsunami" lir. Iba hadir indang tera dang meteta lir aser North-i iba hadir yagi tsükchirtem indang tzyüim-i meima ia teraksatsüba tulu adokdaksütettsü ta ashiba ya-a mejangja. Taoba küm tatemlen Pyongyang-isa, anünglaki spy satellite ka takok ngua yokba sangdongogo. Ajisüaka iba satellite ya inyaksangshi asür masü iba indang osang tejangja memetet. South Korea-i ashiba agi, Russia-i teyari agütsüba North-i iba satellite yoktetogo aser iba melena North-i Russia nem Ukraine rara nung amshitsü atema prangbong injang balala agütsüdar.

NATO War Drill nung sepai 90,000-i shilem agitsü

Brussels, Aenjeti/January 19 (Agencies): NATO-i küm aika sülen taruba hopta nungi tenzükba military exercise tulutiba ayongzükba agitsü renema lir, kong sepai 90,000 shi-i shilem agitsü. Russia den arrtsü tonga NATO-i parnok kübok aliba linük ajak litsü kümzükba yutettsü ta sayutsü atema iba exercise ya ayongzükogo, ta ketdangsürtemi Brestbarnü metetdaksü. Russia aser Ukraine na rara tajemba küma aoba mapang ka nung tang iba exercise ya ayongzükogo. NATO ya lokti tentet ka amabo iba rara nung indang indangabo shilem magir aser parnoki Ukraine nem non-lethal teyari dang agütsü arudar. Ajisüaka NATO kübok züngsemtem aikati Ukraine nem prangbong injang aser military training agütsü arudar. 2022 küm February ita tir Vladimir Putin-i Russia nunger sepaitem nem Ukraine amaktsü asoshi tetuyuba magütsü tsüngda NATO-i Russia aser Ukraine den anütoklen arrtsü nung security akangshia liasü.

Russia-i züngsemtem memakdaksütsü atema parnoki iba jenjang agia liasü. Iba exercise dang ya Steadfast Defender 24 ta ajatsü aser NATO-i ita aika lenla balala nung Europe kübok tesem aika nung exercise balala ayongzükba agitsü, ta linük 31 agi kümteba lokti tentet yagi ashi. Sepaitem May tatem tashi Europe leni aser ajanga süia inyaksangshitsü, koba NATO-i ashiba agi, tarutsü nung mepetmesü adokra renemshia atatsü asoshi lir. NATO indang defense sentong tasenba kübok Russia aser kiralongrar teloktem ya parnok atem tsükchir tulutiba lir. "Alliance-i North America nungi Atlantic tzyüim ajanga sepaitem belena Euro-Atlantic tesemtem dangi sepai yoktsüba tashi sayutsü," ta NATO indang Supreme Allied Commander, U.S. General Christopher Cavoli-i osangbenertem dang ashi. Cavoli-isa, iba ajanga onok telungjem, tashi aser kati ka kümzükba ayutsü atema onok temulungtetba sayutsü, ta ashi.



Port-au-Prince, Haiti nung Ato Kilonser mapa nungi anentsü khanga longkak aitertemi lenmang nung tenokdangba agütsür aliba adena aotsü merangba motorcycle anishirtem dak longkak aiter kati long agi aontsü amokmerenba noksa nung angur. Nüburtemi Ato Kilonser mapa nungi anentsü akhangba ajanga Haiti nung tang mepetmesü tulu adoker lir.

EU-i Ukraine nem teyari agütsüba ajanga Europe rongsenketzung dak kongshitsü: Russia

Aenjeti/January 19 (Agencies): Kremlin-i ashiba agi, European Union-i Ukraine nem teyari tasen agütsüba ajanga tang mangatettep adoker aliba dak mekongshitsü saka Europe Rongsenketzung dak kongshitsü. Financial Times sangdong ka ajanga ashiba agi, Kyiv nem euro billion 20 tashi teyari agütsütsü atema EU renemdar. Iba debt-funded scheme nungi Hungary atsüngindaksütsü (shirnoki Ukraine nem teyari agütsüba anema arudar) aser Kyiv nem tekaratiba nung teyari agütsütettsü. Iba osang indang asüngdangba mapang Kremlin otongdar Dmitry Peskov-i ashiba agi, EU nung saru agütsürtemi parnok indang sen ya Ukraine nung ketdangsürtemi mashiyimi

amshir ta angateta arudar. "Europe nunger aser America nungertemi Ukraine nung ochi mashi inyakyim aliba angateta arudar aser item sen ya shilem tulu ka auyatoker ta parnoki jangja kümdar," ta Peskov-i ashi. "Iba sen yagi rara nung kecha balaka temelenshi matokdaksütsü, saka EU rongsenketzung nung kongshitsü, koba tang kanga mejungi küma odar," ta pai ashi. Peskov-isa, Ukraine nung parnoki kechi mapa tenzükogo, iba ya maneni bener aotsü, ta metetdaksü. EU-i December 14 nü Ukraine den membership atema sensaksemtsü asoshi mulunga agizükogo, ajisüaka Kyiv-i euro billion 50 teyari meshibabo magütsütettsüsa aküm, kechiyong iba anema Hungary-i nokdaka liasü.

6 buba Supongmeren Memorial Volleyball Trophy temogo



6 buba Supongmeren Memorial Volleyball Trophy nung takok angur MH-10 Kohima nungi asayartem den iba asayamung ketdangsürtem külemi tangokba noksa nung angur. Asayamung nung tongti tesemdanger noksa telungba nung angur.

Dimapur, Aenjeti/January 19 (TYO): Mokochung district kübok Molungkimong yimtsüing nung 6 buba Supongmeren Memorial Volleyball Trophy, January 18-19, 2024 anogotem asaya liasü.

Aoertem aser Naga nunger ammag tia nung lia oboula Supongmeren ajanga Khristar osangtajung bener arutsü apular ka ama nübürtem tenük lapoktsü, ta iba asayamung nung tongti tesemdanger Temsumongba Sanglir, Dimapur ajanga ashi.

Anungji pa nüngtem nung ayongzüka amungba trophy nungya Aoertem aser Naga

nunger ajaki pa mapa tajung bileteta shilem agitsüla, ta pai ayongzüka.

Iba asayamung nung mezüngbuba jenjang MH-10 Kohima-i akok, tanabuba jenjang Changtongya Volleyball Association, tasembuba jenjang United Changki aser pezübuba jenjang takok Longjang Compound Young Club ajanga nguteta liasü.

Maneni kija nem agütsüba sempet, Tongpangsunep (MH-10) nem Best Setter, Ahika (MH-10) nem Best Spiker aser Imnungkumba (CVA) nem Man of the tournament sempet agüja liasü.

Iba asayamung nung takok angur nem sempet telemsa yamai agütsü, Champion nem sempet sen 70,000 den trophy aser certificate, Runner Up nem sempet sen 50,000 den trophy aser certificate, 3rd Place nem sempet sen 30,000 den certificate aser 4th place nem sempet sen 10,000.

Maneni Best Spiker nem sempet sen 2000, Best Setter nem 2000 aser Man of the tournament nem sen 2000 agüja liasü.

Iba asayamung ketdangsütsü asoshi Mokochung District Volleyball Association nungi züngsem pezü arua shilem agia liasü.

Australian Open: Coco, Aryna & Sinner nungeri takok angu



Aenjeti/January 19, 2024 (Agencies): Tang asaya aliba Australia Open tetsür kija asaya nung Hokolbarnü fourth seed asayar Coco Gauff-i külem America tsür Alycia Parks straight set nung koka tejakdangi tuogo.

Taoba round nung Caroline Dolehide den kanga toktepa asayaba sülen Hokolbarnübo Gauff-i kecha tetsükdaktsü makai asaya 6-0 6-2 agi straight sets nung ayong ayonga koka liasü.

World number four asayar yagi iba asayamung nung tang tashi nung set ka nung danga tamakok ngua mali, kong pa round pezübuba adena khen danga asayadanga mali.

La quarterfinals nung jenjang ka atema Magdalena Frech mesüra qualifier Anastasia Zakharova na rongnung ka den asayatsü.

Tetsür kija asaya nungsa defending champion Aryna Sabalenka-i asaya amokbanger asaya-a Lesia Tsurenko 6-0, 6-0 agi ayong ayonga koka round pezübubai iogo. La iba asayamung nung tang tashi nung game trok nung dang tamakok ngua lir.

Belarus tsürla shibai taoba küm Melbourne nung nung mezüngbuba Grand Slam koka liasü, la ya Victoria Azarenka sülen iba asayamung atonga akokba mezüngbuba asayar akümtsü asoshi meranga

asayadar.

Sabalenka round pezübuba nung America tsür Amanda Anisimova den asayatsü, shiba ita ti tashi masayai lir tang mezüngbuba Grand Slam nung shilem agidar.

Kasa asayamung tebur kija asaya nung Jannik Sinner-i straight set nung Sebastian Baez kokogo. Iba asaya nung pai game pezü dang mekoki liasü.

Arishi küm 22 tain Italy nunger asayar ya Argentina nunger asayar dang nungi kanga agi tajungba liasü aser pai ghonda ka sür minute 52 nungdang asaya 6-0, 6-1, 6-3 agi ayong ayonga koka liasü.

Pa round pezübuba nung Russia nunger asayar Karen Khachanov mesüra Czech nunger asayar Tomas Machac den asayatsü.

Iba asayamung nung defending champion Novak Djokovic, Carlos Alcaraz aser Daniil Medvedev nunger ajak set kaka nungbo tamakok nguogo, ajisiüka Sinner bo tang tashi set ka nung danga tamakok ngua mali.

Nagaland Olympic & Paralympic Games atema senden ayonger

Dimapur, Aenjeti/January 19 (TYO): Taruba Nagaland Olympic & Paralympic Games 2024 koba February 12 nungi 17 tashi asayatsü lir, iba dak sendakba nung asayamung kecha tetsükdaktsü makai takok nung ayongzüka agitsü atema sensaksemtsü asoshi Nagaland Olympic Association-i coordination senden ka ayongzükgogo.

Iba senden ya January 22 nü 11:00 ako nungi tenzüka Nagaland Olympic Association Headquarters, Sovima, Nagaland nung amentsü, koba Regional Centre for Sporting Excellence kübok office of Nagaland Adventure & Motorsports Association nung amenoka lir.

Nagaland Olympic & Paralympic Games 2024 nung shilem agitsü aliba Sports Association ajak nungi tir aser

general secretary tem aser Nagaland kübok district 16 prongla nungi Chef de Mission, Deputy Chef de Missions tem iba sendne nung adentsü asoshi mepeshia metetdaktsüogo.

Iba dak sendakba nung Secretary-General, Nagaland Olympic Association Abu Metha-i lenir ajak dang senden nung tamakok maludaktsüi shilem agitsü asoshi mepeshia metetdaktsüogo, kechiyong senden nung ken o tongtibangtem sensaksemba den asayamung takok asoshi tasa asatsü aser sentong balala benoka inyakangshitsü atema sensak asemtsü, ta paise shisem.

Maneni ken o dak sendakba nung osang tejangjaba agitsü atema Kajiiloni Krichena den iba Phone no. +91-7085333972 ajanga tongteprateptsü mepeshia metetdaktsüogo.

World Champion Pole Vaulter Shawn Barber süogo



Aenjeti/January 19, 2024 (Agencies): 2015 world champion aser record bena alisang Canada nunger pole vault asayar Shawn Barber temang nung timtem kar adokba sülen arishi küm 29buba nung süogo.

Pa asüba osang ya pa indang agent Paul Doyle-i metetdaktsü. Osang ajanga ashiba agi, Barber ya Bodhbar aonung Kingwood, Texas nung par kidang asü. Barber ya temang nung timtem aika liasü, saka pa kechi timtem agi asü, iba indang osang tejangja memetet.

Pa Las Cruces, New Mexico aso aser par kibong ya United States aser Canada naprongla den sendaktepa lir. Pa University of Akron nung azüngba mapang pole vault asayar tajung ka aküm aser 2014 aser 2015 atonga NCAA indoor titles bena liasü. Maneni

pai 2015 küm NCAA outdoor championship-a akok aser mapang tatsüka lir kasa küm Pan-American Games nung gold medal ngua liasü.

Item takok dak ajemdaker kasa küm Barber ya Beijing nung world championships nung oa asaya aser gold medal ngua liasü. Iba sülen taruba küm pa 2016 Rio Olympics nung pole vault asaya final tonga asaya liasü.

"Asayar tajung ka dang masü Shawn ya nisung tajung ka liasü aser pai tangar asoshi kanga aria bilema liasü. Nisung tajung ka anojungi asayaba ya tesasatsüka," ta Doyle-i ashi.

Barber-i Reno, Nevada nung 2016 küm January ita 15 nü six meters (19 feet, 8 ¼ inches) jokteta liasü, koba tang tashi Canada indang record ka lir.

Pai par tsürapur aser adianu ka toktsür iba lima nungi pilaogo.

BILEMDANGANG
"Temeim aser taochi yabo angati lir; menongnangi benshiang."